

Orang Islam yang Terkemuka

Musa bin Nusayr (4)

Musa bin Nusayr , bukanlah seorang yang nekad mengadu nasib, atau perompak, atau pun orang yang hanya mengumpulkan sebanyak-banyaknya rampasan perang, tetapi ia seorang pahlawan Islam dari kalangan ((orang-orang tabi'in)) yang telah menurut jejak sahabat-sahabat Nabi dengan cara yang sebaik-baiknya. Ia seorang mubaligh yang menyuarakan Islam dalam sebuah negeri-negeri Barbar di Afrika Utara - yang telah kukuh di dalamnya penyembahan berhala dan diperintahkan oleh raja perempuan ahli sihir.

Musa bin Nusayr telah meletakkan berbelas-belas ribu orang Arab dalam kalangan orang-orang Barbar di Afrika Utara untuk mengajar mereka membaca Qur'an, mendidik mereka dengan akhlak dan kebudayaan Islam, dan mendalami pengetahuan mereka dengan ilmu dan hukum Islam.

Demikian kata al-ustaz Muhammad Abdul Ghani Hasan, Mesir, dalam bukunya ((Musa bin Nusayr))

(Terjemahan; Abdullah Basmeh)

Tariq bin Ziyad

Kemenangan-kemenangan yang cemerlang yang telah dicapai oleh ((تَارِيف)) ketika ia ditugaskan meninjau kedudukan musuh dalam daerah Pantai Semenanjung Andalus, menjadikan Musa bin Nusayr berazam mengatur rancangan yang sekian lama terpendam dalam hatinya: membuka negeri yang besar itu. Orang-orang Sepanyol yang sedang berpecah belah dan runtuh semangat mereka, menjadikan Musa mengambil keputusan menggempur Semenanjung Sepanyol seluruhnya, dengan tenteranya yang berhimpun di Pantai Afrika, yang sedang menunggu isyarat panglima. Sekarang tidak ada sebab yang menjadikan dia menangguhkan serangan itu.

Musa bin Nusayr pun mencari di antara orang-orangnya dan pahlawan-pahlawannya seorang yang layak ditugaskan kepadanya rancangan yang besar itu, yang akan diserahkan kepadanya pimpinan tentera penyerbu yang dipercayai tahan berjuang habis-habisan, yang bertanggungjawab tentang nasib tentera Islam yang akan merempuh sebuah negeri asing, yang dikenali sebagai seorang yang berani bertahan dalam saat yang ngeri, yang sanggup mara ketika orang lain teragak-agak dan tersengkak, yang beriman kepada Allah 'Azza wa Jalla ketika perasaan takut menggoncangkan segenap pelosok hati!

Tidak pula panglima Musa bin Nusayr lama mencari,

kerana ia tidak mengenal faham perkauman yang sempit di antara orang Arab dengan orang Barbar, atau di antara orang Timur dengan orang Barat, sekaliannya orang Islam belaka. Islam telah menyamakan mereka, dan menyatupadukan barisan mereka. Islam telah mempersaudarkan di antara orang kecil dengan orang besar, orang kaya dengan orang miskin, orang putih dengan orang hitam, tidak ada kelebihan bagi orang Arab atas orang yang bukan Arab melainkan dengan takwa dan amal yang soleh.

Ia kenal kepada pengikutnya dan orang lindungannya ((Tariq bin Ziyad)), yang berasal dari suku ((Nafazah)) dari kalangan orang ((Barbar)), sebagai seorang yang berani, yang bersungguh-sungguh dan segera bertindak melaksanakan tugasnya. Musa kenal betul kepada Tariq ketika ia melantiknya menjadi Pegawai Daerah di negeri Maghribi dahulu. Tariq juga pernah menjadi Pegawai Daerah di Tanjah (Tanjir), bersempadan dengan daerah ((Sabtah)) yang dikuasai oleh Julian bagi pihak kerajaan Sepanyol, yang menjajah daerah itu di pantai Afrika Utara. Dengan kedudukan daerahnya yang demikian, harus Tariq selalu berhubung dengan Julian dan telah berpuas hati tentang rancangan melanggar negeri Sepanyol di Andalus sesudah mendengar apa yang dikatakan oleh Julian. Harus juga dia telah mencuba menarik perhatian Musa bin Nusayr dan berjaya menjadikan dia bersetuju membuka negeri itu.

Berangkatlah Tariq bin Ziyad memimpin tentera Islam, yang dihantar oleh Musa bin Nusayr membuka negeri Sepanyol, dalam tahun 92 hijriyah. Tentera Islam itu berjumlah tujuh ribu orang, kebanyakannya daripada orang-orang ((Barbar)) yang telah memeluk Islam. Empat buah kapal telah

berulang alik mengangkut mereka ke pantai Eropah lalu berlabuh berhampiran dengan batu-batu besar di pantai, yang terkenal sesudah itu dengan nama ((Jabal Tāriq)) (Bukit Tariq). Dan sekarang disebut oleh orang-orang Barat dengan nama Gibralter ((Gibraltar)). Tariq mengetahui bahawa Roderic - Raja Sepanyol, sedang mengumpulkan tentera yang besar untuk menentangnya, ia pun menulis kepada panglima Musa meminta bantuan tentera sebanyak lima ribu lagi. Dengan itu menjadilah jumlah mujahid-mujahid Islam yang dipimpin oleh ((Tariq bin Ziyad)) untuk membuka dan menguasai negeri Sepanyol ialah dua belas ribu orang.

Sebenarnya Julian, bangsawan Sepanyol itu, yang sedang luka hatinya disebabkan kekejaman Roderic, telah mengambil bahagian besar dalam Angkatan Tentera Islam ini. Ia sendiri telah mengelolakan pengangkutan tentera Islam dan membolehkan mereka menyeberangi selat dengan selamatnya. Ia sendiri telah mengelolakan pengangkutan tentera Islam dan membolehkan mereka menyeberangi selat dengan selamatnya. Ia tidak renggang daripada mereka barang di mana sahaja mereka berada, sebagai penunjuk jalan dan sebagai pengintip berita musuh untuk kepentingan mereka. Perbuatannya memihak kepada orang-orang Islam dan berpaling tada daripada Roderic dan kaumnya adalah di antara sebab-sebab yang penting yang telah menyegerakan tercapainya kemenangan. Seolah-olahnya Allah ‘Azza wa Jalla tatkala menghendaki negeri Sepanyol itu dibuka melalui orang-orang Arab, telah ditakdirkan kejadian itu berlaku dengan bantuan seorang daripada orang-orang Sepanyol sendiri, yang mengutuk rajanya.

Demikianlah, apabila sesuatu perkara itu dikehendaki Allah, maka disediakan sebab-sebab yang menjayakannya.

Sebenarnya perkara tentera Islam menyeberangi ((Laut Tengah)) itu adalah satu perkara yang telah dimudahkan oleh

Allah ‘Azza wa Jalla. Mereka tidak bertemu dengan angin ribut, tetapi sebaliknya angin yang sederhana dan menyegarkan. Kapal-kapal mereka belayar dengan nama Allah, selamat sentosa. Sehinggakan Tariq telah tidur sepuas-puasnya dalam masa belayar, kerana tidak ada sesuatu yang membimbangkannya. Ia telah bermimpi, dan telah dipandang sebagai mimpi yang bersempena baik setelah ia sedar dari tidur, lalu diceritakannya kepada sahabat handainya.

Tariq telah bermimpi melihat Rasulullah *salla Allahu*

'alayhi wa sallam semasa ia tidur dalam kapal. Dilihatnya

Rasullullah sedang dikelilingi oleh sahabat-sahabat baginda

dari kalangan kaum Muhajirin dan Ansar, masing-masing

menyandang pedang dan busaran panah tersangkut di bahu

mereka. Pada saat itu kedengaran Rasul Allah memanggilnya,

ujarnya: “Wahai Tariq! Mara terus!”. Pada

saat itu Tariq melihat baginda dan sahabat-sahabatnya masuk

ke negeri Sepanyol. Baginda dan sahabat-sahabatnya berjalan

dahulu dan ia (Tariq) bersama-sama tenteranya dari

belakang.

Tariq bangun dari tidurnya dengan sukacitanya,

lalu menyampaikan berita yang menggembirakan itu kepada

orang-orangnya. Yakinlah di hatinya bahawa mimpi itu ialah

mimpi yang benar, yang telah dijanjikan oleh Allah ‘Azza wa Jalla

kepada hamba-hambanya yang soleh. Ia yakin bahawa Allah ‘Azza wa Jalla

akan menolong dan menjayakannya dalam perjuangannya yang suci

itu. Kejadian ini menyebabkan semangatnya bertambah kuat,

dan hatinya bertambah tetap. Ia penuh percaya bahawa

kemenangan yang dijanjikan oleh Allah itu hampir tiba.

Bukan pula hanya mimpi itulah sahaja yang menjadi

alamat yang baik kepada Tariq, kerana apabila angkatannya

sampai kudrat, banyaklah orang-orang tawanan yang telah jatuh ke tangan tentera Islam, di antaranya seorang perempuan tua yang terkenal kepada kaumnya sebagai seorang ahli nujum, dan suaminya seorang ahli nujum juga. Suaminya pernah meramalkan banyak perkara dan telah pun berlaku menurut apa yang dikatakannya itu. Ia juga mengatakan bahawa suaminya kerap kali meramalkan tentang seorang amir akan masuk ke negeri Sepanyol, dan dapat menguasainya.

Amir itu kepalanya besar dan pada bahu kirinya ada tahi lalat yang berbulu. Perempuan tua itu pun berpaling kepada Tariq dan berkata:

“ Tuan, wahai orang Arab mempunyai kapal besar, maka sekarang benarlah ramalan itu pada setengah bahagiannya, dan tidak ada yang tinggal melainkan tahi lalat yang ada di bahu. Kalau pada bahu tuan ada tahi lalat itu maka tuan dengan tidak syak lagi ialah amir yang tersebut dalam ramalan itu!”

Tariq tidak teragak-agak lagi daripada mengambil tahu tentang betulkah semua sifat-sifat yang diramalkan itu ada pada dirinya? Ia pun membuka baju untuk melihat bahu kirinya, tiba-tiba didapati ada tahi lalat sebagaimana yang dikatakan oleh perempuan tua itu.

Sudah tentu Tariq berasa suka cita pada kali ini sebagaimana ia berasa suka cita dengan mimpiinya dalam kapal dahulu, yang dipandang sebagai alamat yang baik.

Apabila Roderic mengetahui bahawa Tariq dan tentera Islam telah mendarat di negerinya, ia pun ber lengkap sedia dengan sesuatu angkatan tentera yang besar dan cuba menyatu padukan orang-orangnya yang sedang berpecah belah. Ia dapat mengumpulkan satu tentera yang berjumlah seratus ribu

dari seluruh negerinya, lalu mara hendak menentang tentera Islam, dengan dikelilingi oleh anak-anak raja dan orang-orang besarnya.

Anak-anak raja dan orang-orang besar yang sedang berpecah-belah itu memang mudah bersatu padu apabila negeri mereka dilanggar musuh, tetapi oleh kerana mereka tidak puas hati terhadap pemerintahan Roderic yang kejam dan zalim maka tak dapatlah mereka memberikan kerjasama sebagaimana yang sepatutnya. Mereka suka Roderic tewas dalam peperangan itu menurut sangkaan mereka bahawa orang-orang Arab tidak akan berkekalan tinggal di negeri mereka bahkan akan balik semula sebaik-baik sahaja menang dan mendapat harta rampasan perang yang banyak. Pada masa itu mereka akan memilih seorang raja daripada anak-anak raja Sepanyol sendiri yang akan memegang teraju pemerintahannya.

Tetapi walau bagaimanapun, sebab-sebab kemenangan tentera Islam yang utama ialah iman dan keberanian orang-orang Islam yang berjuang itu, serta keyakinan mereka yang bulat tentang kemenangan yang cemerlang yang telah dijanjikan oleh Allah 'Azza wa Jalla bagi hamba-hambanya yang mukmin. Semangat iman yang menjulang-julang ini menjadikan tentera yang dua belas ribu orang mengalahkan tentera Roderic yang berjumlah seratus ribu dan lengkap pula dengan alat-alat senjata yang lebih handal.

Sungguh menakjubkan, suatu puak yang kecil melanggar puak yang besar di negerinya sendiri, sedang puak yang kecil itu jauh beribu-ribu batu dari tanah airnya sendiri, dengan dipisahkan oleh laut, kemudian berjaya mencapai kemenangan yang besar yang tidak pernah berlaku sepertinya, kecuali kemenangan tentera Islam ketika

berjaya meleburkan kerajaan Parsi dan Rom dalam zaman khalifah Umar bin al-Khattab!

Sebenarnya Roderic telah melakukan kesilapan yang besar apabila ia mengangkat dua putera Raja Vitiza (VITIZA) yang telah dirampas takhta kerajaannya, untuk memimpin tenteranya. Padahal mereka ialah musuhnya dan sedang mengutuknya seperti Julian. Mereka bercita-cita hendak merebut kerajaan ayahanda mereka daripada tangannya.

Anak-anak raja itu bermesyuarat hendak menikam Roderic dari belakang dalam pertempuran itu kerana menuntut bela terhadap khianatnya kepada ayahanda mereka dahulu dan perbuatannya merampas takhta kerajaan yang sepatutnya mereka warisi. Mereka pun menghantarkan seorang utusan kepada Tariq bin Ziyad, menyatakan bahawa Roderic pada masa yang lalu hanya seorang pegawai kepada ayahanda mereka Vitiza, tetapi ia telah mengkhianati amanah dalam masa mereka masih kecil. Ia telah merampas takhta kerajaan ayahanda mereka, dan kerana itu mereka berazam hendak menuntut bela. Mereka sekarang meminta jaminan aman daripadanya (Tariq) dan akan memihak kepadanya bersama-sama penyokong-penyokong mereka apabila kedua-dua tentera - Islam dan Sepanyol - bertemu kelak di medan perang. Mereka tidak mahu daripada orang-orang Arab sesuatu pun selain daripada menghendaki Tariq mengambilkan kepada mereka tanah-tanah kebun ayahanda mereka di negeri Sepanyol yang telah dirampas oleh Roderic. Tanah-tanah itu sebanyak tiga ribu kebun yang sehabis-habis subur tanaman-tanamannya di seluruh negeri dan banyak sekali mengeluarkan hasil. Kebun-kebun inilah yang kemudiannya terkenal dengan nama ((Tanah-tanah raja)).

Tentera yang mendarat di Semenanjung Sepanyol dengan dipimpin oleh Tariq bin Ziyad telah menghabiskan di situ

sebahagian dari bulan Rejab tahun 92 hijriyah,
dan bulan Sha'bān, dan sekarang tibalah bulan
Ramaḍān, yang di dalamnya Allah 'Azza wa Jalla telah menurunkan
al-Qur'an. Berhimpunlah tentera Islam dengan sabar, sabar
menagan derita dalam perjuangan dan sabar menahan lapan
dan dahaga, serta sabar menahan diri daripada nafsu
syahwat dan kelazatan, kecuali kelazatan berjuang pada
jalan Allah.

Kedua tentera yang bersedia hendak berperang, masing-masing
telah menduduki tempat-tempat perkhemahan yang tidak berapa
jauh antara satu dengan yang lain. Ini menjadikan
Roderic berkehendak kepada berita perkhemahan tentera Islam
dan hendak mengetahui perihalnya, cara pakaianya, dan
bilangannya. Ia pun memilih salah seorang yang dipercayai
dan terkenal pandai mencari berita dan maklumat.

Pergilah pengintip rahsia itu sebagaimana yang
diperintahkan oleh rajanya. Tetapi ia telah dikejar oleh
orang-orang Arab setelah ia menghampiri perkhemahan tentera
Islam lalu lari dengan memecut kudanya dan dapat
melepaskan diri. Kembalilah ia tercungap-cungap lalu
masuk mengadap Roderic.

“ Bagaimana kamu lihat mereka wahai pahlawan yang
gagah berani?!” bertanya Roderic.

“Tuanku,” kata orang itu dengan tercungap-cungap
“perkara itu bukan kepalang, orang-orang yang serupa
dengan gambar-gambar yang terdapat dalam keranda.... telah bertapak
di sini, berjaga-jagalah akan kerajaan dan tentera tuanku.
Orang-orang yang mendatang itu nampaknya hendak merebut apa yang
sedang dikuasai oleh tuanku. Mereka berani mati

kerana itu. Mereka telah membakar hangus kapal-kapal yang membawa
mereka ke mari, supaya berputus asa daripada kembali
ke tempat mereka. Mereka telah berazam hendak tinggal menetap
di sini. Mereka telah berbaris di tanah rata yang luas
di kaki gunung dengan semangat yang teguh bertahan, kerana
tidak ada tempat lagi untuk mereka melarikan diri.”

Berita yang telah disampaikan oleh pengintip rahsia
itu kepada Roderic, cukuplah untuk menggerunkan
hati raja yang kejam itu dan mengegarnya.

-bersambung

BUKU2 RUMI

*Pendidikan	\$1.20
*Akhlak	1.20
* Surat Menyurat	1.50
Sejarah Perak Dahulu dan Sekarang				2.00
Penglipor	1.50
Panduan Pekedai2 Jahit				0.70
Balek Dari Medan Perjuangan				1.00
*Jalan ka-Kota Baharu	1.50
Keris Sempena Riau	1.00
Tinjauan Sastera Tanah Ayer				1.50
Sisa Neraka Dunia	1.00

Buku A.BC. (buku bachaan) di-dalamnya
tiga warna

*Kalau memesan hendak-lah sebutkan naskhah
Rumi. Kerana buku ini ada naskhah Jawi-nya

\QALAM

356/358, GEYLANG ROAD.

SINGAPORE 14.